

Стихиры Погребения на «Господи, воззвах», глас 1:

Да будут уши Твои // внимлюще гласу моления моего.

Дивны Твоя тайны, Богородице:/Вышняго престол явилася еси, Владычице,/и от земли к Небеси преставилася еси днесь./ Слава Твоя боголепная,/богоподобными сияючи чудесы./ Девы с Материю Царевою,/на высоту вознеситесь./ Благодатная, радуйся, с Тобою Господь, // подай миру Тобою велию милость.

Аще беззакония назриши, Господи, Господи, кто постоит? / /Яко у Тебе очищение есть.

Твое славят усение/Власти и Престоли,/Начала и Господства,/Силы и Херувими и страшнии Серафими,/ радуются земнороднии,/о Божественней Твоей славе красящися,/припадают людие со Архангелы и Ангелы и воспевают:/Благодатная, радуйся, с Тобою Господь, // подай миру Тобою велию милость.

глас 6:

Имене ради Твоего потерпех Тя, Господи, потерпе душа моя в слово Твое, // упова душа моя на Господа.

Днешний день тайно/великий псалмопевец прообразоваше, глаголя:/воскресни, Господи, в покой Твой,/Ты и Кивот святыни Твоя./И паки: предста, глаголя, Царица одесную Тебе,/рясны златыми одеяна, преиспещрена./Сия бо есть благословенная суббота,/сей есть упокоения Божественный день,/в оньже почи от живота Мати сущи Живота,/ смотрением еже на смерть,/плотию субботствовавшая и и преставльшаяся,/и на Небеса возшедшая/силою Иже из Нея воплощагося Христа Бога,/и с Ним во веки веков вечнующая,/и дарующая нам живот вечный//с любовию чтущим святое Ея усение.

Слава, и ныне, глас 1:

Богоначальным мановением,/отвсюду Богоноснии апостоли, / облаки висоце взимаеми,/дошедше пречистаго и живоначальнаго Твоего тела,/любезно лобызаху. / Превышния же Небесныя силы,/со своим Владыкою пришедше,/ богоприятное и пречистое тело предсылающе,/ужасом одержими;/прекрасно же предыдяху/и невидимо вопияху превышним чиноначалием:/се Всецарица Богоотроковица прииде./Возьмите врата и Сию премирно подымите,/ Присносущнаго Матерь Света,/Тоя бо ради всеродное человеком спасение бысть./На Нюже взирати не можем, / и Той достойную честь воздати немощно:/Тоя бо преизящное преходит всяк ум./ Темже, Пречистая Богородице,/присно с Живоносным Царем и Рождеством живущи,/молися выну сохранить и спасти / от всякаго прилога противнаго/новыя люди Твоя:/Твое бо предстательство стяжахом, // во веки светоявленно блажаще.